





10260

SONGE
ARRIVE' A
VN HOMME
D'IMPORTANCE.

SVR LES AFFAIRES
DE CE TEMPS.



A PARIS,


M. DC. XXXIIII.

SONG
ARRIVE
Case
F
39
VN HOME
1634507
IMPORTANCE

SALES AFFAIRS
DECEMBER



ARRIVE
MAY 1891




ADVERTISSEMENT

A V L E C T E U R .

IL se passe maintenant tant d'affaires en l'autre Monde, & les Esprits s'y rencontrent si dru, & nous viennent voir si souvent, qu'on est contraint bon gré malgré d'en parler ; Mais comme on sçait que plusieurs personnes ont peur des Esprits qui reuiennent la nuit, apres vne longue & meure deliberation, qui a retardé mesme l'impression de cette piece, on n'a pas esté d'aduis d'y laisser le tiltre qu'elle auoit auparauant, à sçauoir de l'Ombre de Gautier Garguille : Outre que comme plusieurs ont esté touchez de sa mort, plusieurs ont aussi escrit plus par affection que par verité, tesmoin ses Reuelations qu'on a desia fait courir, aussi fausses que les deux premieres pieces, qui ont esté bernees & mesprisees avec iuste raison, & que vous n'aurez iamais eues si les Imprimeurs n'y eussent esté trompez les premiers. Que si ces pieces precedentes pour estre trop fades vous ont degousté, on a fait vne si bonne fausse à celle cy, que Gros Guillaume assure & iure par ce qui est de plus facetieux dans ses extrauagances & ses brocards, qu'il ne sçauroit vous seruir d'un meilleur plat à l'Hostel de Bourgongne, & que si vous digerez & distilez bien ces pensees à force

de rire, vous ne pisserez que de l'eau rose. Gardez-vous donc bien sur tout d'en faire des cornets d'espices & de cloux de girofle, ou des mouchoirs, sur peine de mourir de melancolie, & de deuenir iaune & sec comme reguelisse, veu que si iamais piece de la foire S. Germain merita vostre cabinet, c'est celle-cy, qui au lieu d'un sol qu'elle vous reuiendra maintenant, vous coustera plus d'un teston aux iours gras. Au reste que ce changement de tilire ne vous retienne d'y mettre vostre argent: Car apres l'auoir leu vous anrez le cœur bien dur, & serez bien desdaigneux, si vous ne pardonnez à l'Imprimeur vne si douce tromperie, & s'il a desguisé ou retranché quelque chose qui eust peu faire que vos femmes fussent mortes de ioye.



SONGE ARRIVE' A VN
*homme d'importance, sur les affaires
 de ce temps.*

LE GROS - GVILLAVME ayant bien soupé
 aux trois Maillets la veille des Rois iour pour
 iour, eut dans son premier somme vne vision autant
 agreable qu'espouuantable, à l'heure proprement
 que les champignons croissent dans les iardins, &
 que le guet reuient de la ronde. Ce fut l'ombre de
 GAVTIER GARGVILLE qui s'apparut à luy
 dans la mesme forme qu'il auoit sur le Theatre, &
 qui luy dit ces paroles avec vne voix semblable à
 celle d'un esprit.

Cher Amy, d'avec lequel ie n'ay iamais esté se-
 paré de plus loin que de la largeur d'une table cou-
 uerte de bonnes viandes, n'ayes point de peur; Ie
 suis, non pas ce fameux Dom-Guichot, à qui les
 mouches, les choux & les moulins donnoient l'es-
 pouuante; Mais cet imparangonnable GAV-
 TIER GARGVILLE, la fleur de l'Hostel de
 Bourgongne, l'honneur du Theatre, & le Pere des
 bonnes chansons. Tu sçauras que la Normandie
 m'enfanta entre la poire & le fromage; qu'en cette
 annee les pommes vinrent en telle abondance qu'il
 y eut double Automne, & qu'on n'apprehendoit
 pas moins qu'un deluge de cidre: On vit en plu-
 sieurs endroits rire des pierres, des arbres, des ci-

trouilles, & des personnes qui n'auoient ry il y auoit plus de quarante ans. Ce qui fut interpreté par Nostradamus qui viuoit pour lors, que ma naissance seroit la mort de la melancolie, & la production d'un homme qui auroit un souverain remede contre le mal de rate. Encore que le vieux prouerbe die que de ce pais il n'en vient point de meneurs d'Ours ny de bastleurs, il est tres-vray pourtant que i'en suis venu aussi bien que toy. Si i'ay à me plaindre maintenant c'est des fieres Destinées, qui deuoient me donner, à proportion de mon esprit iouial & pantalonnesque un corps de l'estoffe des Astres, ou de la matiere des canons, ou bien me permettre pour le moins de durer autant que mes habits. Mais la Parque impitoyable m'a fait descendre plustost de vingt années que ie ne voulois dans les champs Elisées, où ie t'assure que Caron est aussi seuer pour empescher de sortir de ces lieux, que nostre Portier l'est aux Soldats pour l'entree de l'Hostel de Bourgogne. Que si ie te viens reuoir, c'est avec bon priuilege paraphé de Pluton & de Proserpine, seellé de poix & en loye de noir cramoisy, non point pour troubler ton repos, mais pour asséurer le mien & detromper tout le monde, sur les faux bruits qui courent de moy dans Paris depuis ma mort, touchant mon Testament, ma Rencontre avec Tabarin en l'autre monde, & plusieurs autres choses qui offensent toutes les oreilles qui aiment la verité.

Tu scauras que le Testament qui a couru dans Paris est faux & suggeré, ie n'en veux point d'autre preuue que la signature: Car qui a ven iamais un testament escrit en l'air, sur toiles d'araignees, avec

7
des pieds de mousches ? Et par consequent le Notaire qui l'a signé deuroit estre brulé à petit feu comme vn papillon à la chandelle, ses biens confisque & annotez aux garces de Paris, le tiers aux Estafiers de Venus, & le reste aux pauvres Plaideurs & miserables Clercs du Palais, qui sont descheus depuis peu du priuilege de la Basoche pour leur Comedie du Mardy-Gras. En vn mot ce Testament est bastard, & voicy le legitime qu'on pourra cognoistre par cinq ou six clauses, comme on cognoist les bordels aux enseignes de toubac & de collers d'empezeuses. La premiere est au profit de la belle Vailliot, qui m'a tousiours fait l'honneur de me donner place dans la loge treillissée de ses bonnes graces, & dont les yeux disputent fort & ferme avec Iupiter de la puissance du foudre: à raison principalement qu'elle nous a seruy pour faire venir plus de monde à l'Hostel de Bourgongne, que ne fera iamaïs Guillot-Gorju, ny vn bouchon bien verd au meilleur Cabaret de Paris. Ce Testament chante ainsi.

Je donne & legue à Madamoiselle Vailliot, pour l'honneste affection dont i'ay tousiours tasché de meriter ses boinnes graces, mes manches de ratine de Florence, pour en faire ce qu'elle voudra.

Je donne & legue vingt-quatre escus d'argent monnoyé, pour marier soixante des plus belles filles qui viennent d'ordinaire à la Comedie: & cela au prorata del'argent, & selon le tost des mariages de l'ancienne Gaule.

Je donne & legue mon chapeau le plus haut de forme à tous ceux qui portēt les armoiries d'Acteon,

sans discussion ne diuision quelconque.

Ie donne & laisse à prendre à Madamoiselle Beaupré & Madamoiselle Vailliot vne rente viagere sur le plus liquide de l'Hostel de Bourgogne, pour se remarier dans sept ans d'icy, selon que portel' Ordonnance, à compter du iour & heure de ma mort, pourueu qu'elles ayent nouuelles & bon certificat comme leurs maris sont morts à quelque bresche, ou en quelque bataille nauale, & non autrement.

Ie donne & legue de plus à Madamoiselle la Fleur, le reste des syrops de ma maladie, pour luy adoucir vn peu la voix.

Ie donne & laisse à tous les goutteux de Paris, & principalement à Guillaume le Gros, la souplesse de mes iambes, encore que sa graisse soit cause qu'on accuse la nature de prodigalité en sa generation, & que les meilleurs Medecins de la Faculté l'ayent censé & réputé, immenble.

Pour mes papiers, tant mobiliers, qu'immobiliers, qui consistent en vne liasse de chansons, ie les laisse par indiuis aux Imprimeurs & aux Dames.

Ie donne & laisse à deuiner à tous les esprits de chamois & de cuir boulu à couleur de bronze, que le vulgaire ignorant appelle Esprits forts, où i'ay peu desfrober la matiere de ces gaillardes chansons.

Pour ma Calotte doublée des sept Arts liberaux, que i'auois eue des meubles d'Aristote apres qu'il fut noyé, ie la legue & donne aux fous des petites Maisons; tant à ceux qui le sont toute l'année, qu'à ceux qui le sont par quartier.

Pour mon Office, à cause que ie ne scay s'il est meuble ou immeuble, ie ne le laisse à perfonde.

A tous

A rous ceux & celles de quelque âge, sexe, ou condition qu'ils puissent estre qui ont augmenté nos reuenus ; Comme aussi à tous Fripiers, Patissiers, Cabaretiers, Vendeurs de biscuit & macaron, qui ont gagné leur vie avec nous, & cōtribué à nos desseins, ie legue & donne ma benediction.

Aux Filous en quelque païs, climat ou region qu'ils puissent estre à l'heure que ie parle, soit en l'vn ou en l'autre Hemisphere, ie donne & legue irrevocablement ma malediction dès à present comme tousiours ; Et veux & entends que pour auoir souuent troublé la Comedie ils soiēt sans contredit declarer à son de trompe, perturbateurs du repos public & ennemis du genre humain, & en ce cas elle leur tiendra nature de propre, à la charge qu'ils feront part de cette donation aux anciens Maistres de l'Hostel de Bourgogne qui nous ont suscité des procez.

A la reserue de ceux que ie viens de nommer, pour monstrier que ie n'ay point de venin sur le cœur, ny de fiel non plus qu'un pigeon, ie pardōne à tous mes ennemis visibiles & inuisibles, de poil ou de plume, soit qu'ils soient nez ou à naistre ; Et principalement à tous les Sculpteurs, Peintres, Iurez Graueurs de Paris qui ont fait nos pourtraits depuis peu au naturel ; A sçauoir de Turlupin, de Guillaume, de Fracasse & de moy, & nous ont mis dans les Almanachs comme quatre signes nouveaux apparus au Firmament : car cela a esté vn presage de ma mort. &c.

Avec quelque chose que ie laisse au bon homme Maistre Georges, à la charge qu'il prendra le soin de la decoration de mes funerailles. Le tout

signé, Paraphé, & deuëment collationné comme dessus en datte du 8. Décembre 1633.

Voyla, cher Amy, les clauses moins melancoliques de mon veritable Testamēt, où ie n'ay adiousté que les poincts & les virgules qui ne sont dans la minutte chez le Notaire : Ie te coniure par le Fleuve du Stix, & par ta femme qui dort à tes costez de vouloir en aduertir le peuple, la premiere fois que tes gouttes te permettront de monter sur le Theatre.

Pour cette rencontre de Tabarin & de moy en l'autre monde, c'est vne chose aussi fausse que le Testament : car depuis que ie suis habitant de ce sombre pays ie ne l'ay veu ny entendu encore qu'il fut mon beau-pere, ayant ouy nouuelle qu'il est desia passé avec ces fameux Angouleuents, Valerans, & quelques vns de nos Poëtes deffuncts sous les Myrthes amoureux.

Tous ceux que i'y ay rencontré d'abord, c'a esté Iean Petit, Pierre Delaruey qui expient leurs crimes passez sur le bord du Fleuve, & qui sont estōnez tous deux cōme des fondeurs de cloches de ne voir plus en ce pays de par delà de Soleil, de Lune, ny d'Estoilles. Le bruit est sur la riuē du Styx qu'ils sōt là detenus pour auoir fait l'Horoscope de Mademoiselle du Boulay, & predict quantité de faulx Eclipses & malheurs. Et de n'auoir sceu predire à plusieurs ieunes hommes les veritables eclipses d'argent dans leurs bourses, causees par le trine aspect de Venus au 25. degré de l'Ascendant, ny leur mort, ny la mort de tant de lapins, poullets d'Inde, perdrix & beccasses en ces iours gras.

Tout ce que i'ay peu entendre de la dispute de ces

deux pauvres Mathematiciens touchant l'opinion de Copernic & Galilei qui tiennent que la terre se remue; c'est qu'ils le nioient absolument, encore que leur marmitte eust esté souvent rēuersee en ce pays cy: Car disoit Iean Petit, comment les trois Maillets, la grosse Teste, la Pomme de Pin auroient-ils tousiours esté en leurs places si la terre se remuoit? Cecy soit dit pour ta consolatiō. Apres quoy ie t'assure qu'ils ont eu beaucoup de honte de me voir si pres d'eux; c'est pourquoy ils se sont cachez dans la troupe chetive des faiseurs d'Horoscopes & diseurs de bonne aduventure où ie les ay perdus de veüe.

Vue autre preuue bien forte, que ceste Rencontre n'est que l'imagination de quelque esprit bourru; c'est qu'on ne parle en ce pays ny de la reformation des passemens, ny si d'oresenauant les Dames porteront plus de trois mouches sur leur visage aux despens des vieux haut de chausses de velours & de satin de leurs marys. Ou si elles auront long temps le dos descouvert comme la gorge: car toutes ces choses ne sont point du ressort des Champs Elisees.

Où ie te diray bien en passant qu'on voit comme par trochers de troupes de ieunes filles qui sont mortes de rire à la Comedie, entre lesquelles il y en a deux ou trois qui t'accusent de leur mort, pour y estre venuës vne fois seulemēt & auoir ouy la moindre de tes extrauagances. Et de toutes en general le nombre est si grand qu'on ne peut presque où les logger; Et comme elles sont mortes en riant elles ont encore la bouche fenduë iusques aux oreilles, qui est vne chose fort plaisante à voir, tesmoin Moraus & Rabelais qui en font leurs choux gras, & se creuent

de rire là auprès. En vn autre costé de la riue se voyent quelques femmes qui sont desia mortes de regret pour la reformation des passémés, à ce qu'on peut prejurer : Car on les voit encore toutes fuir la vené du fleuve, craignant d'y voir comme dans ces grands n iroirs de la foire S. Germain la honte de leurs collets, encore qu'elles n'en ayent point : mais c'est vn effect de leur imagination grotesque qui ne les peut encore quitter, si au prealable elles n'ont beu vne gorgée du fleuve d'oubly. En vn autre costé sont les Anglois, Allemans, Ambitieux, preneurs de Tabac & Alchimistes qui sont dans vn mesme lieu, comme gens qui se repaissent tous de fumée. En vn autre canton à l'ombre d'un petit bois, se voyent pêle-mêle quelques honnestes femmes avec des femmes de ioye : car comme on ne les a point distinguees d'habit dans le monde, Pluton veut & entend qu'elles ne soient aussi separees en ces agreables demeures. Pour des Notaires, Sergens & Records, ie n'en ay veu aucun : car il faut croire qu'ils n'habitent point les chāps delicieux où sont les ames bienheureuses, mais qu'ils sont tourmentez avec les Sisyphes & les Ixions dans le Tartare.

De te dire où est l'appartement des Comediens ie n'en sçay rien, pour n'y auoir encore esté, mais ie m' imagine qu'ils sont logez bien pres des vendeurs de mitridat, des Violons, des filles de ioye & des Musiciens, dans vne place grande comme peut estre la place Dauphine ou le Pont-neuf; car ces sortes de gens ont tous vne mesme vertu contraire à celle des oignons.

Surquoy ie desire bien t'aduertir, que ce qui est

couché dans ces fausses reuelations dernières, touchant les honneurs que reçoient les Comediens en ce pays-là, est vray en vn sens & faux en l'autre. Car pour ceux de nostre troupe Royale ils n'y sont pas trop bien recueillis, d'autant qu'ils reçoient tous les honneurs possibles dès ce monde cy & les caresses des Grands. Pour ceux du Tripot de la Fontaine, comme il semble qu'ils ne soient bastis que pour resiouir ceux qui rient pour rien, & iouër des farces deuant les ombres. Il est tres-vray de dire qu'ils sont fort achalandez en ce pais, & qu'ils vont boire quelquesfois au Cabaret avec Alexandre. Mais, cher Amy, ne leur enuie point cette faueur : car ta physionomie seple vaut mieux sans parler, que toutes leurs farces & Comedies : Et puis qu'ils ne sont ny honorez ny estimez en ce monde cy, il y a quelque raison & apparence qu'ils le doiuent estre en l'autre. Tout ce qui me retardera de passer en cette agreable demeure, c'est qu'il me faut expier la faute que i'ay faite de n'auoir monstré le secret de mon art à personne.

Car quoy que Guillot-Gorju fust le plus prochain & habile à succeder en ligne collaterale, suiuant & conformément les Aphorismes d'Hypocrate, & qu'il fasse le mieux qu'il peut, i'ay ouy vn bruit sourd que plusieurs ont dit desia, Encore n'estoit-il que le deffunct, & qu'il ne me ressemble que d'habit : Car on a beau dire, il faut que cela vienne de pere en fils. Croy moy que ce n'est pas comme aux Menechmes de Plaute, où il y a deux semblables : Car la Nature n'a peu faire qu'un Gautier Garguille depuis que le Monde est Monde, non plus qu'elle ne fera iamais

vn Fariné quite ressemble, quoy qu'on puisse alleguer de Goguelu qui veut acheter ta suruiuance. En vn mot, ceux qui seront si effrontez de dire que ce Lyonnois me ressemble en gestes & hautsfaits, c'est comme s'ils prenoient leur nez pour leurs fesses. Et qui en voudra chercher d'autres quenous il aura autant de peine à nous trouuer que ceux qui cherchent la pierre philosophale.

Cher Amy ie ne dis point cecy pour offenser la Comedie ny nostre amoureuse Congrégation. Au contraire si ces paroles que ie te dis, par la permissiõ de Proserpine, sont veuës en public, cela fera que les plus serieux quitteront leurs plus pressantes affaires pour venir prendre place de bonne heure à l'Hostel de Bourgogne, & iouyr du bien de te voir, tandis que l'ame te bat dans le corps, & au lieu de deux testons en donneront six.

De plus, ie t'assure que quand tu tomberois de vieillesse comme le chasteau de Bisseste, tu ne verras iamais reuenir ce temps où on ne donnoit qu'un sol au parterre, & deux aux galleries: car à moins d'estre basseleur on ne peut faire cela. Quand tu n'estimerois point la Comedie pour le profit qui en vient, tu deurois estimer sa Noblesse & la mienne, encores que i'aye vescu en Franc bourgeois: Tu sçais que nous auions aux champs vn coulombier à pied & à cheual, qu'il y a vne porte cochere à l'hostel de Bourgogne. Que toutes les femmes qui ont l'honneur de iouer la Comedie sont Damoiselles; Que tu as fait acquisition depuis peu d'un petit cheual pour ne plus aller à pied; Que nous n'auons que des noms de Seigneurie, ou de choses les plus agreables dās la

Nature: Cōme de Prez, de Fontaines, & de Fleurs.
En vn mot, que nous ne tenons point de boutique.

Continuë cher Amy, si cen'est que tu veuille te retirer ainsi que Medor, estimant tousiours la Comedie que pas vn siecle n'a condamnée, que les plus critiques & hypocondriaques ne sçauroient desapprouver, & que les Philosophes ont appellee le Tableau des actiōs humaines, le sel de la vie, & l'obiet des voluptez plus innocentes. Sçache si tu ne le sçais desia, que la Comedie est bonne en soy, que si elle est mauuaise, ce n'est que par accident; c'est à dire, quand il entre plusieurs Passe-volans, Escrocs, & Philous dans l'hostel de Bourgogne sans payer, si cen'est de petites raisons, ou de grosses iniures, & à lors croy moy que la Comedie est fort mauuaise & preiudiciable.

Adieu, ie te recommande sur tout ma chere femme que i'ay si chastement aimée, prends en le soin & demeure tousiours avec elle en mesme logis, & en mesme chambre s'il se peut faire, sans scandale; fais cas de son amitié plus que de dix mille patagons, voire de mille millions de quarts d'escus, quand ils vaudroient vingt sols dès à present: & ne trouble de tes pleurs le repos de mes cendres, prenāt pour consolation qu'apres tout ce monde en gros & en détail n'est qu'une vraye Comedie. Adieu, mon priuilege expire, & l'heure me presse de me retirer d'où ie viens. N'oublie de faire imprimer ces paroles.

Ce fantasme estant disparu, le Gros-Guillaume qui ne songe volontiers en ce temps que de vin & de bouteilles, s'estāt resueillé en surfaut se trouua avec vne sueur froide, & saisi d'une grande frayeur, quiluy

fit dire en tremblant à sa femme qui n'auoit rien veu ny entendu,

Sic ille manus, sic ora ferebat.

Qu'il ne se trompoit point, & qu'il auoit veu son cher Gautier en chair & en os avec sa calotte, ses manches rouges, ses grandes mains, ses iambes seiches, & tout son attirail Comique.

C'est pourquoy, Messieurs, le Gros Guillaume qui n'a iamais pleuré, ny fait pleurer le monde si ce n'est à force de rire, estant reuenu de son effroy, & voyant que son amy estoit sorty expres des champs Elisees pour luy dire des choses si importantes, pour ne frustrer ses intentions, & recognoistre ses grands seruices rendus à la Comedie, il a voulu faire imprimer ces paroles aux despens du public, avec des caracteres qui vous pourront mesme charmer. Elles ne vous cousteront maintenant quel'achapt, encore n'est-ce pas trop, veu qu'à luy il luy en a costé vne sueur froide & vn bon rheume à sa femme. On ne vous les vend pourtant qu'à la charge que vous en ferez part aux Dames; Que si elles ont chery le corps durant son viuant, elles seront suppliees de faire encore quelques caresses à son Ombre apres sa mort, qui les fera plus rire ie m'asseure que sa ressemblance à l'Hostel de Bourgongne, quand elles auroient vne ame de fine roche & plus dure que les diamants qu'elles ont dans les cheueux, vne enclume au lieu de cœur & de rate dans l'estomach, ou quelques dents de manque dans la bouche.

F I N.



